



Sud Bosne i Hercegovine
Суд Босне и Херцеговине

Broj: S1 3 Iž 040667 21 Iž
Sarajevo, 17.06.2021.godine

Sud Bosne i Hercegovine u Sarajevu, u apelacionom vijeću sastavljenom od sudija Srete Crnjaka kao predsjednika vijeća, Zvezdane Antonović i Redžiba Begića kao članova vijeća, odlučujući o žalbi političke stranke Zavičajni socijaldemokrati-Mile Marčeta sa sjedištem u Drvaru, ulica Omladinskih brigada 45, koju zastupa Mile Marčeta, predsjednik stranke, izjavljenoj protiv odluke Centralne izborne komisije Bosne i Hercegovine broj: 05-01-07-6-1296/20 od 26.05.2021.godine, zbog kršenja Zakona o finansiranju političkih stranaka, u nejavnoj sjednici, održanoj dana 17.06.2021.godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine broj i datum navedeni u uvodu, utvrđeno je da je politička stranka Zavičajni socijaldemokrati-Mile Marčeta, odgovorna što u 2018.godini:

- a) nije uspostavila evidenciju o novčanoj donaciji koju je ostvarila korištenjem poslovnog prostora bez naknade, čime je prekršila odredbu člana 5. stav 4. Zakona o finansiranju političkih stranaka,
- b) nije vodila poslovne knjige na način koji je utvrđen zakonom i drugim propisima u skladu sa zakonom, nije uspostavila pravilne evidencije o prihodima i rashodima, čime je prekršila odredbe člana 11. stav 1. i člana 12. stav 1. Zakona o finansiranju političkih stranaka, nije podnijela godišnji finansijski izvještaj Centralnoj izbornoj komisiji BiH u skladu sa Zakonom o finansiranju političkih stranaka, čime je prekršila odredbe člana 12. stav 4. Zakona o finansiranju političkih stranaka i
- c) nije dostavila postizborni finansijski izvještaj-Opći izbori 2018.godine, čime je prekršila odredbe člana 12. stav 3. Zakona o finansiranju političkih stranaka i člana 15.1 stav 1. Izbornog zakona BiH,

pa joj je na osnovu člana 15. stav 2. i primjenom člana 19 stav 1 tačka b), f), g) i h) Zakona o finansiranju političkih stranaka izrečena :

- 1) za povredu iz tačke a) novčana kazna u iznosu od 500,00 KM (pet stotina konvertibilnih maraka),

- 2) za povredu iz tačke b) novčana kazna u iznosu od 500,00 KM (pet stotina konvertibilnih maraka), i
- 3) za povredu iz tačke c) novčana kazna u iznosu od 3.000,00 KM (tri hiljade konvertibilnih maraka) odnosno jedinstvena novčana kazna u iznosu od 4.000,00 KM (četiri hiljade konvertibilnih maraka).

Protiv ove odluke žalitelj je blagovremeno uložio žalbu zbog nepotpuno utvrđenog činjeničnog stanja. Navodi da su nakon dobivanja obavještenja od strane CIK BiH dostavili izjavu Željka Ivanovića o besplatnom prostoru za rad stranke, te da je uz svaki godišnji izvještaj dostavljena potvrda o predmetnoj donaciji. Dalje navodi da su propusti nastali zbog bolesti knjigovođe koja nije mogla raditi, a da drugi knjigovođa nije bio upućen pa je došlo do propusta. Posebno ističe da su mala stranka i da nemaju sredstava, da se kao povratnička stranka finansiraju iz skromnih priloga, te da ako se ne oslobode kazne odnosno ako se ista ne ublaži, prijeti im gašenje stranke. Predlaže da se žalba uvaži, ukine pobijana odluka i predmet vrati na ponovno postupanje.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu jer je ožalbena odluka donesena na pravilan i potpun način u skladu sa zakonom i podzakonskim aktima.

Žalba nije osnovana.

Prema stanju u spisu predmeta, Centralna izborna komisija BiH (u daljem tekstu CIK BiH) je razmatrajući Preliminarni izvještaj službe za reviziju o pregledu godišnjeg finansijskog izvještaja za 2018.godinu političke stranke Zavičajni socijaldemokratiju-Mile Marčeta broj 03-07-6-309/19 iz marta 2020.godine, utvrdila da je politička stranka prekršila odredbe Zakona o finansiranju političkih stranaka (Sl. glasnik BiH br. 95/12 sa izmjenama). Izvještaj je dostavljen političkoj stranci na izjašnjenje, koja se očitovala na isti naglasivši da su na osnovu preporuka Službe za reviziju otklonili nedostatke ali bez dostavljanja bilo kakvih dokaza za te tvrdnje. Nakon toga Komisija za reviziju je sačinila Konačni izvještaj o pregledu godišnjeg finansijskog izvještaja za 2018.godinu broj 03-07-6-309/19 od 02.06.2020.godine.

Navedeno je bilo osnov da Centralna izborna komisija BiH po službenoj dužnosti Zaključkom broj 03-07-6-1276/20 od 19.11.2020.godine, pokrene postupak utvrđivanja odgovornosti protiv žalitelja, zbog osnovane sumnje da je ova politička stranka u 2018.godini prekršila odredbe Zakona o finansiranju političkih stranaka.

Iz stanja spisa proizlazi da je CIK BiH cijenila sve dokaze koji su u spisu predmeta (Konačni finansijski izvještaj za 2018.godinu, Izjava predsjednika političke stranke od 02.12.2021.godine) te utvrdila da je žalitelj prekršio odredbe člana 5. stav 4, člana 11. stav 1, člana 12. stav 1 i 4, te člana 12. stav 3 Zakona o finansiranju političkih stranaka i odredbe člana 15.1 Izbornog zakona BiH. Provedenim dokazima je utvrđeno da žalitelj nije iskazao nenovčanu donaciju korištenja poslovnog prostora, čime je prekršio odredbe člana 5. stav 4 Zakona o finansiranju političkih stranaka, a koja činjenica nije osporena datom izjavom predsjednika stranke. Iz stanja spisa dalje proizlazi da žalitelj nije vodio u 2018.godini poslovne knjige, kao i da nije podnio godišnji finansijski izvještaj CIK BiH u skladu sa Zakonom o finansiranju političkih

stranaka i Pravilnikom o godišnjim finansijskim izvještajima političkih stranaka, a što se vidi iz Izjave date nakon pokretanja postupka utvrđivanja odgovornosti političke stranke, čime je prekršila odredbe člana 11. stav 1, 12. stav 1, 3 i 4 Zakona o finansiranju političkih stranaka. Navedene odredbe izričito propisuju obavezu političke stranke da vodi poslovne knjige i da dostavlja CIK BiH godišnje finansijske izvještaje u skladu sa zakonom i drugim propisima. Iz tog razloga se žalbeni navodi o skromnim prihodima stranke, problemom oko vođenja poslovnih knjiga i izradom finansijskog izvještaja pokazuju neosnovanim u pogledu oslobađanja od odgovornosti jer se radi o zakonskoj obavezi koju moraju poštovati sve političke stranke.

Preispitujući pravilnost ožalbene odluke u dijelu visine izrečene novčane kazne, apelaciono vijeće je zaključilo da je za utvrđene povrede pod tačkama a), b) i c) pravilno izrečena jedinstvena novčana kazna u iznosu od 4.000,00 KM propisana odredbom člana 19 stav 1 Zakona o finansiranju političkih stranaka.

Nadalje iz obrazloženja pobijane odluke proizilazi da je CIK BiH prilikom izricanja novčane kazne kao otežavajuće okolnosti cijenila činjenicu da žalitelj do sada dva puta kažnjavan zbog postupanja protivno Zakonu o finansiranju političkih stranaka. Nadalje je cijenjeno ekonomsko stanje stranke imajući u vidu da je u 2018. godini ostvarila ukupan prihod od 14.100,00 KM. Utvrđena visina jedinstvene kazne za učinjene prekršaje predstavlja minimalni iznos propisane novčane kazne.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

PREDSJEDNIK VIJEĆA
S U D I J A
Sreto Crnjak